

Flomerschummer Gebabbel



Liewe Flomerschummer,
wammer heitzudaag die Kinner hochdeitsch
redde heert, do kammer sich vorschdelle, daß
in absehbarer Zeid in Flomerschumm kaum noch
äner pälzisch babble kann. Do misst mer jo eigend-
lich was degege unnerne; unn wer is do besser
geeigent, als die Flomerschummer Arweitsgemeinschaft,
die sich jo die Erhaldung vunn Brauchtum unn Kuldur
uff die Fahne gschriwwe hot.

Die Idee is, daß die AGF ab unn zu e klä Heftche ver-
öffendlicht, in dem die Flomerschummer Gelegen-
heit hänn, alles Mögliche an Gedanke uff pälzisch
noizuschreiw - grad so, wie ehm de Schnawwel ge-
wachse is. Des dirft uns Pälzer jo nit schwerfalle!!!
Dodebei kennten sich Jung unn Alt e bissel mit
unsre Mudderschbrooch beschäffische unn außer-
dem wären dodurch e paar orginelle Sache fer die
Nochweld feschghalte.

Im erschde Heft sinn e paar Beischbiele abgedruggt,
daß die Sach emol en Anfang hot.

Unn jetzt bidden mer Eich ganz herzlich um Eier
Mithilf un Eier Zuschrifde. Es kenn sich aach gern
Ausländer beteilische (z.B. Eppstäiner, Rhoihesse usw.)



Gebbt die Beidräg bitte beim
Walder Rupp in de Fränsemer Schdroß 107 ab.

Mer fräen uns druff ! - Aller hopp !!!

Au'ëm Ordsgschehe:

Schääne Fahne hammer in Flomerschumm. Grie unn gelb unn ach noch 's Ortswappe druff. Schaad is bloß, daß mer se so selde sieht. An Kerwe dirfen se mol e paar Daag Luft schnappe- un schwupps - sinn se widder e Johr lang im Dunkle. Dodebei kennt mer

se efters emol naushänge. An Geburtsdaage zum Beischbiel odder annere Feierlichkeide - odder wie 's vor korzem de Fall war - am "Rheinland-Pfalz-Daag". Nix war do zu sehe vunn de Flomerschummer Fahnepracht. Wie dann unsern Landesvadder des Bäämche oigegrawe hot, waren vunn de Stadt drei Fahne gehisst worre. Awwer - ehr werrn 's nit glaawe- kaum hot de Beck widder in soim Audo g'hoggt, sinn a die Fahne widder verschwunde! - - Schaad - gell ???



WELTBOLIDISCHES



Dietmar B.: "Was sinnen des do fer Beere in Ehrm Gaade?"

Udo B.: "Des sinn schwarze Johannisbeere!"

Dietmar B.: "Ei, die sinn jo awwer ganz rot?"

Udo B.: "Ajo, awwer des is bloß, weil se noch grien sinn!"



Manche Leit hänn sich glei nochem Erscheine vum Flomerschummer Koch- u. Backbuch beklagt, daß jo des un des un des Rezebt fehle deht. Do hammer als zu de Leit gsaat: "Ei, warum habt Ehr dann beim Uffruf in de Zeidung Eier Rezept nit abgewwe ??? Also hammer jetzt nochemol noochgfroogt un hänn als erschdes vunn de Wirthe Helga des berihmde Rezebt gebeddelt, nooch dem ern Vadder frieher die gude Lewwerknedel gemacht hot:

Wann vor 30 Jahr die Kerwe agsaat war, hots Freidags e Schbezialidät gewwe: Selwer gemachte Lewwerknedel!

Beim Mezger iss die Lewwer unn de Bauchlabbe beschdellt worre. Mit de Fläschmaschin hot mer dann des Zeig durchgedreht. Die Weck sinn in Wasser oigewäascht worre, unner Dräne hot mer die Zwiwwle gscheelt unn klä gewerfelt unn Gewärze unn Eier hot mer bereityschdelld. Des ganze Zeig is in e grofzi Schissel kumme unn mit de Händ rischdisch durchgekneet worre. Inzwische hot mer en riese Hawwe mit Salzwasser heeß gemacht, aus dem Lewwerdääg schöne Knedel gformt unn die dann im Wasser 20 bis 25 Minudde ziehe losse. Die Lewwerknedel hot mer mit Sauerkraut unn gereeschde Zwiwwle serwiert.

- Isch kann Eich sage, des war äfach e Gedicht. .

Lewwerknedel' a la Walter Wirth sen.

3/4 Pund Lewwer -
1/4 Pund Bauchlabbe -
3 Weck - 3 Eier -
Muschkad, Pfeffer, Salz,
Majoran un e klänes
bissel gem. Nelge -
1 Zwiwwel noireiwe -
1 Zwiwwel glasisch
dünschde -
Weckmehl noch Gfiel.



Helga Wirth

Gudes Gelingen unn gude Abbedid wünscht Eich die

RAEDEL



Do kändder mol brobiere,
des gschwollene Hochdeitsch
in unser dreffendes Pälzisch zu
iwwersetze. Der Schdräfe in de Mitte nennt
am Schluß e beliebdes Flomerschummer Gewäx.

1. - Schwiegertochter
2. - Türgriff
3. - Beliebte Pfälzer Vesper
4. - Angeber mit lautem Mundwerk
5. - Stumpfes Messer
6. - Kartoffelbrei
7. - Nachttopf
8. - Eine Frau, die ununterbrochen redet
9. - Jaucheschöpfeimer
10. - Apfelstrunk
11. - Jeder - ohne Ausnahme
12. - Streuselkuchen
13. - Kinderlatz
14. - Wassrige Kartoffel
15. - Rückstrahler
16. - Wasser aus der Leitung
17. - Behältnis für einen beliebten Vogel
18. - Einer, der nicht gekämmt ist
19. - Feine Suppe aus Knollengewächsen
20. - Einer, der seinen finanziellen Ver-
pflichtungen nicht nachkommt
21. - Riesengroße Schuhe
22. - Anschnittstück eines hellen Brotes
23. - Einer, der immer müde ist
24. - Schwiegersohn
25. - Einer, der groß angibt
26. - Linkshänder

Ä = 1 Buchstabe

Urlaubsgschichtelscher:



Vunn de deitsche Ausländer:

Im ledschde Jahr hammer uff me südfranzösische Cämbingplatz Urlaub gemacht. Der Cämpingchef war en gebirdische Deutsche. Er hot zu uns g'saat, mer sollen uns en schöne Platz raussuche uff dem große Gelände. Des hammer ah gemacht. E schönes Eggelche am Waldrand mit Meeresbligg is uns do glei ins Aag g'falle.

"Do werd nix draus" - hot unsern Boß do g'saat - "des Egg is fer uns Franzose reserviert; do kummen kä Ausländer druff!!!"

- Mergener was, ehr Leit!




In Flomerschumm zu läwe, des is so wunnerschäh;
do kammer, wammer Luscht hot, zum Zwiwwelbrunne gäh.

Im Pawilljon am Falter, do dreffen sich die Leit
im Friejhohr unn im Summer unn in de Woinachtstzeit.
An Flomerschummer Kerwe, do schdeit e großes Feschd.
Do wärd de greeschde Hunger unn a de Dorscht gelescht.

Bei uns im Ord gibts Alles - Grumbeere unn Gemies -
zwä Dokder unn en Zahnarzt unn Pflege ferr die Fieß.

Unn die berihmde Zwiwwle, die eß mer spet unn frieh;
die bringen die Verdauung uff dreiehalb atü.

Doch weil mer so beliebt sinn, hänn mer en mords Verkehr-
drum grawe mer en Tunnel, dann sinn die Schdroße leer!



Bauernregle un Lebensweisheide:

Alles iss so wies iss - bloss schlechder!

Unsern Combjuder kann Alles - awwer sunscht garnix!

Liggt de Bauer dod im Zimmer - lebt er nimmer!

Sinn die Hinkel flach wie Deller,
war de Dragdor widder schneller!

Wanns em Bolidigger emol die Schbrooch verschlecht,
dann halt' er e Redd!

Liewer medidiere als kummhogge un garnix mache!

Sogar die dollscht Fraa heert an de Fieff uff!

Zum Schluss noch ebbes Witzisches:

Ei Kall: Jetzt
simmer doch schunn seit
iwwer 30 Jahr verlobt!
Mänscht nit, daß mer
heirade sollten?

Eigentlich
hoscht jo
recht Lissbett.
Awwer wer wärd
jetzt uns bloß
noch wolle!



Imbressum:

Rausgewwer: AG Flomerschumm
Idee unn Gschdaltung: Walter Rupp

Die erschd Ausgab is gedruggt fer umme
vunn de Fa. Dreher aus Franggedaal

Ufflag: Ähdausendzwähunnertfuchzisch Schdigge